

02. okt. 2017

Uunga siunnersuut: Isumaginnittoqarfiup aqunneqarnera aaqqissuussaanelu pillugit Inatsisartut peqqussutaat nr. 11, 12. november 2001-imeersup allanngortinneqarnera pillugu Inatsisartut inatsisaat nr. xx af xx. xxx 2017-imeersoq

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

SIUMUP tunngaviusumik suliniarnermini isumaa tassaavoq, Nunarput tunngavilerneqassasoq innuttaasut atorfissaqartitaat piunasaallu naapertorlugit inuiaqatigiinni atukkat oqinneruleqqullugit, tamannani isumaqaratta pingaartuusoq. Taamaattumik aamma pingaaruteqarpoq pisortatigoortumik suliassat sapinngisamik ingerlanneqassammata, innuttaasut paasisinnaasaannik, suliassallu inernilerneqarnerat sapinngisamik innuttaasut atugassarititaannut naapertuuttumik ilisimasalimmik ingerlanneqaaqqullugit tamatumanilu aamma inatsisitigut isumannaatsuuneq sissuerlugu.

Naalakkersuisut inatsisissamik siunnersuuteqarnermini siunertaat qulaaniit isigalugu tassaavoq suliat annertunerusumik pitsaassusilimmik naammassineqarnissaat aammalu inunnik isumaginninnerup iluani naammagittaalliutit inatsisitigut isumannaatsuunissaat anguniarneqarluni, tamatumanilu aamma ilanngullugu suliap sularineqarnerani piffissatigut atuinerup sivikillisarnissaa anguniarlugu. Naalakkersuisut immikkut oqaaseqarnermini aamma allapput suliassap piffisatigut sivirusarneranut patsisaaqataasut ilagigaat Inunnik Isumaginninnermut Maalaaruteqartarfiup suliassamik pineqartumik kommuniniit tigusiartarnerat assut piloorartarsimasoq, kommunit tassaamata inunnik isumaginninnerup iluani siullertut aalajangiisartut.

Kommunini amerlanerni suliassat kalaallisut oqaatsivut qitiutillugit sularineqartarput, imatut paasillugu, sullitat oqaloqatiginerini oqaatsivut atorneqartarmata aammalu suliassap sularinerani allattukkat kalaallisut oqaatsivut qitiutillugit sularineqartarmata.

Tamanna pissutaalluni SIUMUMIIT eqqumiigivarput inatsisissamut siunnersuutip aamma ilagim-magu Maalaaruteqartarfiup ilaasortai tallimaasut ikilisarneqassasut pingasuinnanngortinneqarniarlutik, taamatuttaaq siulittaasoq tamakkiisumik atorfeqaatigaluni maalaartarnermut pisortaatigissa-soq, inatsisilerituutut kandidatit ilinniarsimasuusalluni. Ilaasortat sinneri marluusunut piumasarineqarpoq aappaa inatsisilerituujussasoq inunnik isumaginninnikkut misilittagartuujulluni.

SIUMUMIIT tamanna akuersaaruminaatsipparput, imatut inerneqariissammat atorfiit marluusut pinngitsooratik danskinit juristinut inuttalerneqartariaqassasut. Maani Nunatsinni inatsisilerituutut ilinniarsinnaaneq suli periarfissaqanngilaq, tassungalu tapitartuullugu inatsisilerituunik assut amigaaqarluta.

Naalakkersuisut apererusunnarput aasarmanna tusarniaaneq qanoq innikkut pisimanersoq? Tassami Kommuneqarfik Sermersooq kisimi kommuninit tusarniaanermut akissuteqarsimavoq,

taamatuttaa q sunamitaava peqqutaava KANUKOKA´p tusarniaanermut akissuteqarsimangginera?

Illumut Naalackersuisut isumaqarnerput Inatsisissatut siunnersuut eqqarsarluuqqaarluni siunnersuutaasoq? Soorlu tamatta ilisimagipput kommunini meeqqanut sullissineq ima erloqinartorsiorfiutigivoq iliuusissatut pilersaaruteqanngitsorpasuullutik – takorlooriartigumi angajoqqaat 300-ut meeqqatik angerlartinniarlugit maalaaruteqartarfimmut saaffiginnissagaluarpata iliuusissamik pilersaaruteqartoqannginneralu tunngavigalugu meeqqaminnik angerlartitsiniarlutik, kommunillu sap. ak. sisamat ingerlanerani taamaallaat suliat 10 akissuteqarfigisinnaappagit, taava inatsisissatut siunnersuummi maalaaruteqartoq kommunit akissuteqarsimanggipata, iluaquserlugu maalaaruteqartarfik aalajangiisussaammat taava meeqqat 290-it angerlartinneqassappat?

Aamma assersuutigineqarsinnaavoq siusinaartumik pensionisiaqalerniarluni qinnuteqartoq, tassani najugarisami pissutsit aallaavigalugit tamakkiisumik pensionisiaqalertitsisinnaaneq periarfissaavoq, taannalu inatsisileritooq qanoq ililluni qulakkeerneqassava najukkami pissutsit qanoq innerannik? Taava aalajangiinissamut tunngavissaqarnerpoq?

Aamma tamakkununga assersuutigineqarsinnaasumik Isumaginninnermut maalaaruteqartarfik apeqquillivoq.

Iluatsillugu paaserusunnarpoq Siusinaartumik sulisinnaajunnaarnersiuteqartut immikkut maalaartarfissamik pilersitsisoqarniarnera qanoq ingerlanersoq, aningaasallu immikkut illikartinneqarsimasut pilersaarutit naapertorlugit atornerqarnersut?

Naalackersuisut tunngavilersuutiminni allapput suliassat sivisuallaamik suliarineqartarnerannut pat-sisaasoq tassaasoq, kommuninit piloortarnerat. Kommunit suliaasa kalaallisuinnaq oqaasertalerlugit nassiunneqarsinnaappat?

Namminersorlutik Oqartussat Inunnik Isumaginninnermut Departementia Nakkutilliisartussanik pilersitsisareermata paasinarsivoq kommunit inunnik isumaginninnermut inatsisit naapertorlugit suliassat suliarisinnaasimangikkaat, aammalu atorfeqartut ilaasa suliassanik 120-nik sinnilinnik suliaqartarsimasut. Paasissutissat taamaattut kisiisaluunniit najoqqutaralugit illumut Naalackersuisut isumaqarpat danskit inatsisilerituunit atorfinitsitsineq iluarsissutitut naammattoq, naak Nunatsinni pissutsit annertunerusumik ilisimasaqarfiginngikkaat, aammalu maalaarutitut suliassaani piffissamik atuinermi annikilliliisinnaasut?

Kiap isumagissavaa suliassat kommuniniit Inunnik Isumaginninnermut Maalaaruteqartarfimmut nassiunnissaat? Kiap suliassami pineqartumi paasissutissat atortullu kalaallisuunngortinnissaat akisussaaffigissavaa? Kiap isumagissavaa danskit inatsisilerituuisa Nunatsinnut pissutsinut paasitillugit ilisimasaqalernissaat? Inunnik isumaginninnikkut inatsisit amerlasuutigut imatut sananeqateqarput, allaat iliuusissatut pilersaarummik sanasoqalerniartillugu sullitatta inuunermini atugarisaat ilisimaneqartariaqarput – tamakkualu soorunami Nunatta suatungaani najugaqarnerput apeqqutaalluni nikingasarsinnaapput.

Siunnersuummut uunga taarsiullugu ajunnginnerussagaluarpoq Naalackersuisut kommunini suliassaasut Maalaaruteqartarfimmut sukkanerusumik apuussinnaanissaat.

Periarfissaasinnaanginnerluni Maalaaruteqartarfiup ataani sulisoqassappat, kommuninukarsinnaasunik qulakkeerumallugu suliassaasut illumut nassiunneqassasut, tamannalu suliassatut isiga-

lugu pisariaqartinneqassappat, taava inatsisit sorliit allannguuteqartariaqarpat? Taamaaliorniaruttalu qanoq amerlatigisunik sulisoqarlutalu suliassaqarfik aningaasaliiffigisariaqassava? II.il.

SIUMUT isumaqarpoq inatsisitigut allannguisoqartariaqalersoq, kisianni tassa tamatumani pisariaqarluinnassaaq allannguutissatut siunnersuutaasut inuiaqatigiinnut naleqqussarneqarnissaat aammalu atorfissaqartinneqarnera najoqqutaralugu naleqqussarsimassasoq. Atorfinnik nutaanik pilersitsisariaqanngilagut danskit inatsisilerituunit taamaallaat atorfinitsitsisinnaassagutta, SIUMUT isumaqarpoq Inunnik isumaginninnermi siunnersorti juridisk sagsbehandleritut ilinniaqqissimasunik pissarsioraanni pitsaanerussasoq

Oqaaserineqartut tunngavigalugit SIUMUP siunnersuut taama isikkoqartillugu akueriuminaatsippaa, illuatungaaticullu Naalakkersuisut kajumissaarumavai nalunaajaammik suliaqartitsissasut, tassanilu takutinneqassasoq, kommunini suliassaasartut qanoq ilillugit isumannaannerpaamik torrallataanerpaamillu ajornannginnerpaamillu tunniussinnaasassaneraat, taamatuttaaq nassuiaatigineqassasoq qanoq ililluni isumaginninnermut siunnersorti inatsisilerituutut allaffissornikkut sullissisinnaasutut ilinniarsimasoq Maalaaruteqartarfimmi pisortaasinnaanersoq.

SIUMUP Siunnersuut ataatsimiititaliamut susassaqartumut aappassaaneerneqannginnerani suliari-neqaqqaarnissaa inassutigaa.

Martha Lund Olsen

Siumut